



Adresa:

Ul. Hamdije Čemerlića 39a
71000 Sarajevo
<http://www.voda.ba>

tel. +387 33 726 400
fax. +387 33 726 423
e-mail: info@voda.ba

Broj:

UP-1/21-3-40-490-10/23

Datum:

25.4.2024. godine

„Agencija za vodno područje rijeke Save“ Sarajevo rješavajući po zahtjevu pravnog lica „I-SELIMOVIĆ“ d.o.o. Cazin, za izdavanje vodne dozvole za ispuštanje tehnoloških otpadnih voda i aktivnosti koje mogu imati specifične uticaje na vode prilikom izvođenja aktivnosti na lokaciji postrojenja za proizvodnju asfalta sa pratećim sadržajima, izgrađenog u naselju Lohovo, Grad Bihać na osnovu člana 139. stav (1) tačke 3. i 10. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98, 48/99 i 61/22), donosi:

RJEŠENJE o vodnoj dozvoli

1. Daje se vodna dozvola pravnom licu „I-SELIMOVIĆ“ d.o.o. Cazin, za ispuštanje tehnoloških otpadnih voda i aktivnosti koje mogu imati specifične uticaje na vode prilikom izvođenja aktivnosti na lokaciji postrojenja za proizvodnju asfalta sa pratećim sadržajima, izgrađenog na zemljištu označenom kao k.č. broj 543/1, PL broj 668, K.O. Lohovo (novi katastarski operat), odnosno k.č. broj 1466, ZKU 134 K.O. SP_Ripač Lohovo (stari katastarski operat), Grad Bihać.
2. Ova vodna dozvola ne oslobađa podnosioca zahtjeva obaveze pribavljanja vodne dozvole za korištenje vode i ispuštanje sanitarnih otpadnih voda, za čije je izdavanje nadležno Ministarstvo poljoprivrede vodoprivrede i šumarstva Unsko-sanskog kantona, u skladu sa članom 139. stav (2) tačka 1. i 2. Zakona o vodama.
3. Rješenje o vodnoj dozvoli se donosi na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
 - 3.1. Da korisnik, u toku važenja ovog Rješenja, realizuje dostavljeni dinamički plan sa finansijskom procjenom ulaganja (Prilog A), odnosno da izvede radnje predviđene revidovanom investiciono-tehničkom dokumentacijom, Glavni projekt vanjskog uređenja za kompleks asfaltne baze i betonare, urađen od strane EUROING d.o.o. Bihać pod brojem AGP 04-05/16, maja 2016. godine u Bihaću, revidiranim od strane DIWANX d.o.o. Sarajevo pod brojem 08-06/16, dana 03.06.2016. godine, u Sarajevu, odnosno:
 - Da izvrši nabavu i ugradnju kamenog materijala za izgradnju nosive konstrukcije predviđene kružne saobraćajnice oko postrojenja za proizvodnju svježe betonske mase i platforme za punjenje automješalica sa betonom i pranjem istih do kraja aprila 2024. godine,
 - Da izvede radove na izgradnji platforme za punjenje automješalica betonom i pranje istih do kraja decembra 2024. godine,
 - Da nabavi ivičnjake 15/25 i izvrši oivičenje kružne saobraćajnice oko postrojenja za proizvodnju svježe betonske mase do kraja maja 2025. godine,
 - Da izvrši nabavu i izgradnju slivnika, revizionih okana i pjeskolova te ostalih radova predviđenih projektnom dokumentacijom, vezano za odvodnju otpadnih voda do kraja juna 2025. godine,
 - Da izvede nadzemni rezervoar predviđen za rezervu tehnološke vode za betonaru, kapaciteta 20 tona sa predviđenim razvodom do postrojenja, do kraja juna 2026. godine,
 - Da izradi polaganje završnog habajućeg sloja asfalta predviđene kružne saobraćajnice oko postrojenja za proizvodnju svježe betonske mase do kraja juna 2026. godine,

- 3.2. Da korisnik predmetnih objekata pogona za proizvodnju asfaltne smješe isti održava u funkcionalnom stanju i koristi u skladu sa njegovom prirodom i namjenom te u skladu sa uslovima iz ove vodne dozvole, okolinskom dozvolom te saglasnostima i dozvolama dobivenim od strane drugih nadležnih organa.
- 3.3. U skladu sa projektnom dokumentacijom vršiti skladištenje loživa ulja i bitumena na način da se spriječi dospijevanje istih u tlo i površinske vode te obezbijediti vodonepropusnost AB tankvane za prihvrat loživog ulja u slučaju akcidenta.
- 3.4. Skladište ulja i maziva je potrebno natkriti ili izgraditi namjenski objekt za skladište i pretakanje ulja i maziva te uraditi podnu ploču od vodonepropusnog betona otpornog na dejstva hemikalija.
- 3.5. Da se istrošena ulja, nauljene krpe i sav opasan otpad koji se koristi u procesu čišćenja i održavanja objekata i postrojenja redovno prikuplja i propisno, privremeno skladišti u metalne spremnike, do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru.
- 3.6. Da korisnik predmetnog objekta, za vrijeme trajanja ove dozvole, obezbjeđuje da se onečišćene vode sa saobraćajnih i pretakališnih površina nesmetano sakupljaju i odvođe do objekta predviđenog za tretman tehnoloških otpadnih voda (separator ulja i masti), a zatim tretirane vode ispuštaju u recipijent – lateralni kanal oborinske odvodnje.
- 3.7. Objekte za prikupljanje, tretman i ispuštanje onečišćenih otpadnih voda (slivnici, rešetke, kanalizaciona mreža, separator ulja i masti, i dr.) potrebno je održavati i koristiti na takav način koji će obezbijediti njihovu potpunu ispravnost i funkcionalnost. Čišćenje i pražnjenje separatora ulja i masti može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja taložnika i separatora ulja i masti, neophodno je voditi službenu evidenciju i arhivu.
- 3.8. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe. Rezultate analiza dostaviti ovoj Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti („Službene novine Federacije BiH”, broj 14/10, 14/13, 26/14, 23/17 i 41/20).
- 3.9. U toku važenja ovog Rješenja, korisnik predmetnog objekta je obavezan poduzeti sve potrebne mjere kako bi kvalitet oborinskih onečišćenih voda, a prije ispuštanja u recipijent, zadovoljio granične vrijednosti emisije definisane u članu 14. i 15. Uredbe o uslovima ispuštanja otpadnih voda u okoliš i sisteme javne kanalizacije.
- 3.10. Opasni materijal i otpad, kako u toku izvođenja radova tako i u toku rada pogona ne smije se ni privremeno odlagati na česticu „vodno dobro”, odnosno u vodotok i na njegove obale.
- 3.11. Da se sa opasnim i štetnim materijama (loživo ulje, mazut, aditivi, i sl.) postupa savjesno pri skladištenju, transportu i pretovaru kako ne bi došlo do štetnih posljedica po tlo i vode, uslijed prosipanja istih.
- 3.12. Osigurati priručna sredstva za brzu intervenciju u slučaju nekontrolisanog istjecanja loživa ulja i naftnih derivata, kako bi se spriječilo moguće onečišćenje voda i tla (piljevina, prikladni adsorbensi, odgovarajuće posude, uređaji za pretakanje i sl.).
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH”, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH”, broj 92/07, 46/09, 79/11 i 88/12), Prilog 1, Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, korisnik postrojenja za proizvodnju asfalta sa pratećim sadržajima je dužan ispoštovati sve mjere i aktivnosti propisane isto.
6. Korisnik predmetnog objekta je dužan, u skladu sa članom 26 a. stav (1) Uredbe o izmjenama i dopunama Uredbe o uslovima ispuštanja otpadnih voda u okoliš i sisteme javne kanalizacije („Službene novine

Federacije BiH", broj: 1/24), na obrascu iz Priloga B Uredbe, izvještavati ovu Agenciju i Federalno ministarstvo okoliša i turizma o realizaciji planiranih aktivnosti u zadatim rokovima iz detaljnog dinamičkog plana, i to:

- Prvi put nakasnije do 31.12.2024. godine,
- Drugi put nakasnije do 30.06.2025. godine.

Na osnovu navedenih izvještaja, ova Agencija će, u skladu sa članom 26 a. stav (2) Uredbe, sačiniti sumarni izvještaj, na obrascu iz Priloga C Uredbe i dostaviti ga Federalnom ministarstvu okoliša i turizma te Federalnom ministarstvu poljoprivrede, vodoprivrede i šumarstva, najkasnije mjesec dana po isteku naprijed navedenih rokova, koji će biti javno dostupni na web stranicama navedenih ministarstava najkasnije u roku od 10 dana od dana prijema sumarnih izvještaja.

7. Ukoliko radom predmetnog pogona dođe do promjene režima površinskih ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. Ova vodna dozvola, shodno članu 26. stav (1) Uredbe o ispuštanju otpadnih voda u okoliš i sisteme javne kanalizacije („Službene novine Federacije BiH", broj: 26/20, 96/20 i 1/24) se daje sa rokom važenja do 30.06.2026. godine.
10. Ovo rješenje o vodnoj dozvoli prestaje da važi ako korisnik predmetnog objekta ne ispunji uvjete iz tačke 3.1. ovog rješenja.
11. Prije isteka važnosti ove dozvole, korisnik je dužan da podnese zahtjev za izdavanje nove vodne dozvole.
12. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenju ovog vodnog akta.
13. Uvjet za izdavanje novog vodnog akta je ispunjenje uvjeta navedenih tačkom 3. ovog rješenja i ukoliko isti ne budu ispunjeni neće se moći izdati novi vodni akt, a u skladu sa odredbama Zakona o vodama i Uredbe o izmjeni i dopuni uredbe o uslovima ispuštanja otpadnih voda u okoliš i sisteme javne kanalizacije.

Obrazloženje

Pravno lice „I-SELIMOVIC" d.o.o. Cazin, obratilo se ovoj Agenciji dana 27.10.2023. godine zahtjevom, broj: 308-Z/23 (zaprmljen dana 1.11.2023. godine) za izdavanje vodne dozvole za ispuštanje tehnoloških otpadnih voda i aktivnosti koje mogu imati specifične uticaje na vode prilikom izvođenja aktivnosti na lokaciji postrojenja za proizvodnju asfalta sa pratećim sadržajima, izgrađenog na zemljištu označenom kao k.č. broj: 543/1, PL broj 668, K.O. Lohovo (novi katastarski operat), odnosno k.č. broj 1466, ZKU 134 K.O. SP_Ripač Lohovo (stari katastarski operat), Grad Bihać.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

- Aktuelni izvod iz sudskog registra, Matični broj subjekta upisa: 1-2548-00; izdan od strane Općinskog suda u Bihaću dana 04.10.2023. godine (ovjerena kopija),
- Uvjerenje o poreznoj registraciji, izdano dana 13.12.2002. godine, od strane Federalnog ministarstva financija-finansija, Porezne uprave – Kantonalni ured BIHAĆ (ovjerena kopija),
- Uvjerenje o registraciji/upisu u Jedinstveni registar obveznika indirektnih poreza, izdano od strane Uprave za indirektno-neizravno oporezivanje Bosne i Hercegovine, broj 04/1-UPJR/1-5018-2/10, dana 06.12.2010. godine, u Banjaluci (ovjerena kopija),
- Upotrebna dozvola sa aspekta zaštite na radu za asfaltnu bazu; izdana od strane ovlaštenog pravnog lica Euroing d.o.o. Bihać pod brojem UD-018/033/2022, dana 12.07.2022. godine, u Bihaću (kopija),
- Rješenje, kojim se privrednom društvu DD „KRAJINAPUTEVI" p.o. Bihać odobrava upotreba slijedećih objekata i postrojenja na lokalitetu „Lohovo": 1. radnog platoa, 2. drobiličnog postrojenja „SCT", 3. separacije kamenih agregata „SCT", 4. betonare „SCT", 5. asfaltne baze „MARINI"; izdano od strane Federalnog ministarstva energije, rudarstva i industrije pod Up/I broj: 09-18-139/00, dana 26.05.2000. godine, u Mostaru (kopija),
- Ugovor o prodaji imovine; ovjeren od strane notara Adema Jakupovića iz Bihaća pod OPU-IP broj 92/2016 dana, 15.03.2016. godine, u Bihaću (kopija)
- Uplatnica upravne pristojbe,
- Rješenje o okolinskoj dozvoli, izdano od strane Federalnog ministarstva okoliša i turizma pod brojem UPI 05/2-23-11-51/18 SC, dana 20.06.2018. godine, u Sarajevu (kopija),

- Rješenje o vodnoj dozvoli; izdano od strane Agencija za vodno područje rijeke Save Sarajevo pod brojem UP-I/25-3-40-034-9/19, dana 11.04.2019. godine (kopija),
- glavni projekt – vanjsko uređenje za kompleks asfaltne baze i betonare, urađen od strane EUROING d.o.o. Bihać pod brojem AGP 04-05/16, maja 2016. godine, u Bihaću, revidiran od strane DIWANX d.o.o. Sarajevo pod brojem 08-06/16, dana 03.06.2016. godine, u Sarajevu (na uvid),
- zaključak o visini i roku za plaćanje posebnih troškova, izdan od strane Agencije za vodno područje rijeke Save pod brojem UP-1/21-3-40-490-4/23, dana 20.11.2023. g. te kopija naloga za plaćanje istih, službena zabilješka o povratu projektne dokumentacije, broj: UP-1/21-3-40-490-7/23 od 8.1.2024. godine,
- dinamički plan po godinama sa aktivnostima, financijskom procjenom i rokovima za izgradnju i puštanje u rad sistema za prikupljanje, tretman i ispuštanje tehnoloških otpadnih voda, a najkasnije do 30.06.2026. godine.

Nakon pregleda dostavljene dokumentacije, u skladu sa članom 12. stav 5. i 6. Pravilnika o sadržaju, obliku, uvjetima i načinu izdavanja i čuvanja vodnih akata („Službene novine Federacije BiH“ broj 31/15, 55/19, 41/20 i 63/22), izvršen je pregled izgrađenog poslovnog kompleksa asfaltne baze sa pratećim sadržajima (postrojenja stabilne separacije i betonare su van upotrebe) na lokaciji Lohovo, investitora „I-SELIMOVIC“ d.o.o. Cazin, i tom prilikom sačinjen zapisnik o uviđaju broj: UP-1/21-3-40-490-6/23 od 26.12.2023. godine pri čemu je utvrđeno: Poslovni kompleks postrojenja za proizvodnju asfalta je izgrađen u naselju Lohovo, Grad Bihać. Pogon se sastoji od: - postrojenja stabilne separacije tehničkog kamena (trenutno nije u upotrebi jer podnosilac zahtjeva „I-SELIMOVIC“ d.o.o. Cazin posjeduje kamenolom Vilenjača Brig sa separacijom u naselju Vilenjača, općina Cazin, sa kojeg vrši dovoz tehničkog kamena za proizvodnju asfalta), - postrojenja za drobljenje kamena (van upotrebe), - postrojenja asfaltne baze kapaciteta 100 t/h, - postrojenja za proizvodnju betona kapaciteta 30 m³/h (u toku renoviranja postrojenja), radnog platoa sa pomoćnim objektima. Postrojenje za separaciju – drobljenje i klasiranje mineralne sirovine proizvođača „SCT“ Trbovlje je kapaciteta 60 m³/h, sastoji se od primarnog (udarna drobilica kapaciteta 60 m³/h gdje se vrši usitnjavanje kamenog materijala na grubu frakciju od 0-100 mm) i sekundarnog dijela sa klasirnicom (doprema grube frakcije sa primarnog postrojenja i separacija na frakcije: 0-4, 4-8, 8-16 i 16-32 mm) – postrojenje nije u upotrebi. Postrojenje asfaltne baze je proizvođača „Marini“, tip M-95 E180, kapaciteta 100 t/h. Sastoji se od: - silos za filer (25 t i 50 t), - cisterna za bitumen (25 tona x 4 kom), - cisterna za loživo ulje (podzemna 40 tona i nadzemna 8 tona), - postrojenje za grijanje bitumena TIP 400, - spremnik za agregat (6 dozatora) – bubanj za grijanje agregata, - pogonska laboratorija i upravljačka jedinica. Postrojenje za proizvodnju betona je proizvođača „SCT“ Trbovlje, tipa AB 18 i AB 24, kapaciteta 30 m³/h. Sastoji se od: - gravitacione mješalice 0,33 m³, - silos za cement (25 tona x 2 kom), - vaga za agregat i cement (2 pužna dozatora), - dozator za vodu, - transporter za agregat, - silos za cement (1750 kg), - upravljačka jedinica – postrojenje nije u upotrebi. Objekt je priključen na javni gradski vodovodni sistem za potrebe sanitarne vode i vode za protiv požarnu zaštitu (na predmetnoj lokaciji se ne vrši proizvodnja betona). Manipulativne površine za rad oko postrojenja betonare su tamponirane bez završnog habajućeg sloja. Iste nisu oivičene niti je izgrađen taložnik za prijem otpadne vode od pranja postrojenja i manipulativnih površina. Nije izgrađena niti radna ploha za pranje automješalica te servisiranje radnih mašina. Nije izveden niti nadzemni rezervoar, predviđen za rezervu tehnološke vode za betonaru, kapaciteta 20 tona sa predviđenim razvodom do postrojenja, a sve to jer postrojenje za proizvodnju betona nije u upotrebi. Potrebno je predvidjeti recirkulaciju izbistrane vode iz taložnika betonare u proizvodni proces. Radni prostor asfaltne baze je asfaltiran i oivičen tako da oborinske vode sa istog, koje mogu da sadrže suspendirane materije, kupe se i odvođe ka separatoru ulja i masti na potreban tretman. Oborinske vode sa internih saobraćajnih površina koje mogu da sadrže produkte naftnih derivata sa radnih mašina i vozila u prometu internog saobraćaja, kao i suspendirane materije sa isith te prašine sa kamenog agregata i gotovih proizvoda se slijevaju preko taložnika prema separatoru ulja i masti na potreban tretman. U prethodnom postupku je konstatirano postojanje urbanističke saglasnosti i odobrenja za građenje te vlasnički odnosi, odnosno specifikacije ugrađenog separatroa ulja i masti. Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontroli izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07). Razmatrajući podneseni zahtjev, a na osnovu dostavljene dokumentacije i uviđaja izvršenog na predmetnom lokalitetu, a u svrhu smanjenja negativnih uticaja predmetnog objekta i aktivnosti na stanje voda i vodni režim, podnosiocu zahtjeva su ovom vodnom dozvolom, u tački 3. dispozitiva ovog Rješenja, propisani uslovi pod kojima je izdano ovo rješenje i koji se trebaju ispoštovati u toku važenja istog.

Na osnovu provedenog postupka konstatuje se da je podnosilac zahtjeva, „I - SELIMOVIC“ d.o.o. Cazin, ispunio minimum uslova za izdavanje vodne dozvole te je riješeno kao u dispozitivu ovog rješenja. Podnosilac zahtjeva je na ime izdavanja ovog vodnog akta izvršio uplatu pristojbe iz tar. broj 43. Zakona o federalnim upravnim pristojbama i Tarife federalnih upravnih pristojbi („Službene novine Federacije BiH“, broj 06/98, 8/00, 45/10 i 45/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Ahmet Smajlović, dipl. inž. arh.

Po ovlaštenju
Rukovodilac sektora za izdavanje vodnih akata



Haris Ališehović, dipl. inž. građ.

Dostaviti:

„I-SELIMOVIC“ d.o.o. Cazin, Polje bb, 77 220 Cazin
AVP Sava, ISV – Vodna knjiga
Sektor 50
Sektor 40, arhiva
Oglasna ploča-AVP Sava